

**Naalakkersuisut Qaortumi GUX-imi timersornermut sammivilimmik pilersitsinissami neqerooruteqarnissamilu pitsaaqutit ajoqutillu nalilersorneqarnerannik imalimmik nassuiaasioqqullugit peqquneqarnissaannik Inatsisartut aalajangiiffigisassaattut siunnersuut. Nassuiaammi ersersinneqassapput taamatut isummernermi aningaasatigut allaffissornikkullu kingunerisassai. Nassuiaat Inatsisartunut agguanneqareersimassaaq 1. januar 2027 nallertinnagu.**

*(Inatsisartunut ilaasortamit Karen Marie Kyed Frederiksen, Demokraatineersumit saqqummiunneqartoq)*

## **pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap**

**siunnersuutip aappassaaneerneqarneranut**

## **ISUMALIUTISSIISSUTAA**

Ataatsimiititaliap suliarinninnermini ilaasortarai:

Inatsisartunut ilaasortaq Nivi Heilmann Efraimsen, Inuit Ataqatigiit, siulittaasoq  
Inatsisartunut ilaasortaq Isak Johannessen, Naleraq, siulittaasup tullia  
Inatsisartunut ilaasortaq Margrethe Thårup Andersen, Demokratiit  
Inatsisartunut ilaasortaq Hans Erik Enoksen, Demokratiit  
Inatsisartunut ilaasortaq Anders Olsen, Siumut

UKA2025-mi ulloq 7. oktober 2025-mi siullermeerinninnerup kingorna ataatsimiititaliap siunnersuut misissorpaa.

### **Siunnersuutip imarisaa siunertaalu**

Naalakkersuisut Qaortumi GUX-imi timersornermut sammivilimmik pilersitsinissamut nassuiaasioqqullugit peqquneqarnissaat siunnersuuteqartup kissaatigaa. Siunnersuuteqartup oqaatigaa Qaortumi GUX-imi timersornermut sammivilimmik peqalernat inuunerinnerulernermik – timikkut eqqarsartaatsikkullu – inuusuttunut toqqammaviliisuussasoq. Timersorneq timigissarnerlu aqqutigalugit inuuniarnikkut inuttullu ineriartornermik pissarsiaqarsinnaapput kiisalu iluatinnaatilinnik piginnaasanik peqalissammata soorlu pissusissamik malinnilluarnermik, anguniagaqarnermik, uteriinnermik suleqatiginnissinnaanermillu.

### **Siunnersuutip Inatsisartuni siullermeerneqarnera**

Siunnersuutip siullermeerneqarnerani assigiinngitsumik qisuariarfigineqarpoq. Inuit Ataqtigii, Atassut aamma Naleraq siunnersuummik itigartitsipput, akerlianillu Siumut siunnersuutip ataatsimiititaliamut suliassanngortinneqarnissaanut innersuussilluni. Taamaattorli oqallinnerup nalaani partiit arlallit siunnersuutip ataatsimiititaliamut suliassanngortinneqarnissaa ilalerpaat, taamaalillunilu immikkoortoq Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliamut innersuunneqarpoq.

Naalakkersuisut imatut allannguutissatut siunnersuuteqarput:

*“Elite Sport Greenland aamma ilinniarnertuunngorniarfiit sisamat peqataatillugit inuusuttullu misilittagaat ilaatillugit Naalakkersuisut suleqatigiissitalioqqullugit Inatsisartut aalajangiiffigisassaattut siunnersuut. Periarfissamik nutaamik nunatsinni ilinniarnertuunngorniarfiit akimorlugit atorneqarsinnaasumik timersortartut immikkut piginnaasaqartut timersuutiminnik pingaarnersiuisinnaanngorlugit ilinniakkatigullu sammivimmik namminneq kissaatigisaminnik toqqaasinnaanngorlugit suleqatigiissitaq innersuussutissanik suliaqassaaq. Innersuussutit tunngavigalugit periarfissaq qanoq piviusunngortinneqarsinnaanersoq kingusinnerpaamik 1. januar 2027 Naalakkersuisut Inatsisartut ilisimatissavaat”.*

### **Siunnersuutip aningaasatigut kingunerisassai**

Nassuiaatip suliarineqarnissaa aningaasartuuteqarfiussasoq siunnersuuteqartup allassimagaa ataatsimiititaliamit maluginiarneqarpoq. Taakkua atorfilittap ukiumut sulinerata nalinga 500.000 kr. qaangissanngikkaa naatsorsuutigineqarpoq.

### **Ataatsimiititaliap siunnersuummut oqaaseqaatai**

Inuusuttut ilinniarnarup timersornerullu ataqtigiissinnissaannut periarfissaqarnissaat pillugu pisariaqartitsineq Naalakkersuisut akissuteqaatiminni isumaqatigigaat ataatsimiititaliamit maluginiarneqarpoq. Taamaattorli Nuummi misilittakkat pillugit Naalakkersuisut tikkuussipput, tassanimi GUX-imi timersornermut sammivilimmi toqqagassaq ilinniartut taamaatiinnartarnerannik ilinniarfimmilu sammiviit toqqarneqarsinnaasut killeqarnerinik unammillernartunik nassataqarpoq. Taamaattumik Qaqortumi periutsumik assingusumik peqalernikkut ajornartorsiutit pioreersut aaqqinneqarnaviannngitsut Naalakkersuisut nalileraat ataatsimiititaliamit maluginiarneqarpoq. Taarsiullugu ilinniarnertuunngorniarfiit sisamaasut akimorlugit ingerlasinnaasumik eqaannerusumillu aaqqissuussinissaq anguniarneqassasoq Naalakkersuisut siunnersuutigaat. Tassunga atatillugu Elite Sport Greenland aamma ilinniarnertuunngorniarfiit sisamat peqataatillugit suleqatigiissitamik pilersitsisoqarnissaa Naalakkersuisut siunnersuutigaat, taakkulu kingusinnerpaamik ulloq 1. januar 2027 Inatsisartunut saqqummiunneqartussanik innersuussutissanik suliaqassallutik.

Timersorneq inuusuttut atugarissaarnissaannut, qaammaasaqalernissaannut pitsaasumillu inuuneqalernissaannut annertuumik iluaqutaasartoq ataatsimiititaliap nalilerpaa. Taamaattumik GUX-imi timersornermut sammivilimmik toqqagassaq qanoq naleqqussarneqarsinnaanersoq imaluunniit inerisarneqaqqissinnaanersoq pillugu misissuisoqarnissaa pissusissamisuussasooq ataatsimiititaliaq isumaqarpoq, taamaalillutik inuusuttut timersornermik soqutigisallit, ilinniarnertuunngorniartut allat assigalugit, ilinniarnernup timersorerullu ataqatigiissinnissaannut pitsaanerusumik periarfissaqalissallutik.

### **Ataatsimiititaliap inassuteqaatai**

- Ataatsimiititaliami amerlanerussutillit, Inuit Ataqtigiiinneersut, Demokraatineersut aamma Siumumeersut, allannguutissatut siunnersuut tulluuttoq akuerisassanngorlugi inassuteqaatigaat:

*”Naalakkersuisut nunatsinni ilinniarnertuunngorniarfiit peqataatillugit GUX-imi timersornermut sammiviit pillugit pitsaaqutit ajoqutillu nalilersornerannik qanorlu timersorneq ilinniarfimmilu sammivinnik nammineq toqqaasinnaanernup ataqtigiiissinneqarnissaanut inassuteqaatinik imalimmik nassuiaasioqqullugit Inatsisartut aalajangiiffigisassaattut siunnersuut. Nassuiaat aningaasatigut allaffissornikkullu kingunerisassat nalilersorneqarnerinik ilaqassaaq UKA 2026-mullu saqqummiunneqassalluni.”*

Taamatut oqaaseqaateqarluni isumaliutissiissummilu allassimasutut paasinnilluni  
ataatsimiititaliap siunnersuut aappassaaniigassanngortippaa.

---

Nivi Heilmann Efraimsen  
Siulittaasoq

---

Isak Johannessen  
Siulittaasup tullia

---

Margrethe Thårup Andersen

---

Hans Erik Enoksen

---

Anders Olsen